

I gro Dzacô, i fiyûë d'éêquye

Oun charë jamei podèquye, mà i Gro Dzacô îre i fiyûë d'éêquye de Chyoun. Ché Dzacô îre oun pû Nindey. Îtâe oun andjörna éná dû béi dû Blœujî. Chû, i grândza é dejô i bœu. Dzacô fajey moujâ à hlë érô, à demyë-djyû, à demyë bîtchya. Oûna chörta d'atlète coume oun derey öra, vyâ, suïdo, batey, oun Hèrcûlo de pèr chi, oun Gargantuâ de pèr léi.

D'aey oun éêquye po parin, chin ey bayée dej avantâdzo, de drey, que d'âtre an pâ. À cou chouéiro qu'éêquye aey fé càquye prejin û Dzacô, prejin qu'ot'an permetû d'aey bien de bën é oun byô nourën, avouë de métre éná p'é mountagne.

Mà oun an, avou'oun ivéi bien on, bien frey, i fin ét inû à mancâ po tchuî. I Dzacô pouey prœu ître oun colösso, y aey avouéi oun cou. Chin ey fajey mâ de véire é chavoue bîtchye choufrî da fan. Îre tortû é nyoun ëntör de yuî po inî ot'idjyë û bayë càquye fachî. Can oun ë fiyûë d'éêquye, fô ch'ën chortî choë. Ch'é dessêda à partî po Chyoun po véire o chyô famœu parin. Pout-étre que me balerë oun cou de man, che dejej i Dzacô.

- Dèquye tû vën féire pèr chi, ey demànde éêquye

- Parin, éi pâ méi de fin po o myô nourën é chéi pâ âvoue pourö ën atsetâ

- Vouâ derën à mouey grândza, prin chin quye te fô, é po paé pâ d'avyëne. Chögna bien é tàvoue chounayë.

I Dzacô vouâ derën à grândza dû parin é cöpe oun byô âdzo de fin, dou sin kilo que dejan, tsârdze ch'o cosson é prin à vey dû Blœujî. Oun cou, oun choë cou qu'a depojâ a tsârdza ën röta. A fé parî é dzo d'aprêi tanqu'aey prœu de fin po fournî ché on ivéi.

Maorœjamin, hlâ förcha dû Gro Dzacô ey djûée de to avouéi. Oun di, qu'oun dzo, ch'a plâcha di quèrye, ën Bâch'-Nînda, oun Nindey dzæu ét inû féire de reprödze û Dzacô. Chichi ey a repondû avou'oun pouën pejan ch'o mouïro. Âtra a vèrchâ é làme. A jû plînta. I Gran Majô a pâ jû d'âtro à féire que d'ënvoéé dou jandârmo dû béi dû Blœujî po aretâ é ramenâ o Gro Dzacô ën Bâch'-Nînda.

- Bondzo, dèquye voj'amîne éná po Blœujî ?

- N'oudran deragnë càquye mo avou'o Dzacô

- Vo firî mal, é partey û bou ouey matën, chéi pâ can tornerë

- Chin fé rin, n'atindrin

- I myô Dzacô arey-t-i fey oun chaquyë de mâ ?

- Ét avouë yuî que no déin deragnë

- Adon, voje chërve oun véiro de ën ën atindin, é oun bocon de pan da chéya. Pouéi pâ voje bayë de möta avouéi, i myô Dzacô tèn chin derën oun artson, a metû oûna möstra péira chû é pouéi pâ ata deplachyë.

- Noje vouâ bien i ën é i pan, ën atindin.

Oûna vouarbèta méi tâ, arûe i Dzacô avou'oun chapën ch'o cosson é o t'acouë bâ ïnquye bâ coume ouchey jû oûna bouïtsa de fin. I chävoua fène a moronâ qu'aey pâ pûchû bayë de möta i dou jandârmo à couja dû pey da péira pojâa ch'o coëhle. I Dzacô to dejoâ, ôte hlâ péira, coume ouchey jû oûna perëta, po chörtî o fromâdzo. É dou jandârmo an pèrdû apetî, che chon èscûjâ é chon repartey po Bâch'-Nînda chin bayë a réyjon da lou vejëta.

Pindin dej an, i coumoûna de Nînda a jû é pitéye avouë hlà d'Ijerâblo po delimitâ o tèritouè ëntr'é dâvoue coumoûne. Arey chamînte jû oun prossë. É bèrdjyë di dâvoue mountagne menâon é bîtchye de âtro di béi, robâon chamînte de fâe troâye ëntchyë lou, che pitâon é che batan. A falû féire inî éj otorité po calmâ éj ësprî, po càquye tin. Chin pouey pâ continûâ. É dâvoue delégachyon che chon retroâye dû béi dû Pra da Dzœu. Hlà de Nînda contâe avou'ô noûtro Dzacô. Coûme féire ? Dû béi dû cœussin, chin di Bedjuï, pâ oûna péira præu grôcha pouey chërvî de tèrmëno. Dû béi dû éin, chin di Nindey, che troâe oûna môstra péira mà trouà ën séi po contintâ é Bedjuï. Po pâ méi aey dej istouère, éj otorité prejînte an convinyû que falîye deplachyë hlà péira dû béi dû cœussin, mà coûme ? Adon i Dzacô ch'é metû ën déan. I limîta ëntr'é dâvoue coumoûne che trûerey à indrey âvoue i Gro Dzacô acherey tséire o rôquye. Chon jû d'acô é i Dzacô avouéi. A falû treyj ömo po âta tsardjyë chû éj etchyëblo dû Dzacô. Chichi che më ën rôte, martchyâe coûme de rin, pâ chamînte échohlâ. Can ét arouà à indrey âvoue arey djuû ître i limîta, che chintîye prèsto à contenûâ, can oun vyëla fëna que nyoun cognechey é chörtéyta d'oun chà pâ prâvoue é a di û Dzacô :

- Aréita-te, pœûja ché rôquye, atramin t'arûerë oun maö.

É i vyëla a dësparû.

Dzacô ch'ët aretâ, émochyonâ, troblâ é a acouley a péira döze pyà méi yuîn déan yuî.

Ché roquye que fé tèrmëne ét ouncô înquye. Dû béi dû éin, che vey oûna cruî tchëncha ën rözö avou'a ètra N. Dû béi dû cœussin, oûna cruî avou'a ètra I.

É grasse û Gro Dzacô que noj âtre Nindey, n'in prey càquye métro i Bedjuï dû béi dû Pra da Dzœu. I cönta noje di pâ chi Gro Dzacô é jû troâ o chyô parin po che confechâ.

Inspiré de la légende du Gro Jacô, Le Livre du Souvenir, Jean-Pierre Michelet
Nendaz, août 2021/Maurice Michelet